

Listovi...

## LISTOVI GRAČANIČKOG KALENDARA OD 1. 11. 2004. DO 1. 5. 2005.

**2. 12. 2004.**

### **SUD BOSNE I HERCEGOVINE UVAŽIO ŽALBU OPŠTINSKOG ODBORA SDP GRAČANICA U VEZI SA NEREGULARNOŠĆU IZBORA U PRIJEKOM BRDU**

Žalbom se mora ponovo pozabaviti Izborna komisija Bosna i Hercegovine, koja je u prethodnom postupku odbacila žalbu SDP Gračanice, utvrdivši da je na spomenutom biračkom mjestu bilo sve "o.k."

**8. 12. 2004.**

### **OKRUGLI STO "SNABDIJEVANJE GRADA GRAČANICE TOPLOTNOM ENERGIJOM"**

Prezentirana je istoimena studija renomirane austrijske firme "Segen", koja je pokazala da je za rešenje tog strateškog komunalnog pitanja za Gračanicu, najbolja kombinacija *bio i termo energije*, koje podrazumijeva korištenje obnovljivih resursa (geotermije i biomase). To budućem investitoru, između ostalog, otvara mogućnost apliciranja na donatorska i kreditna sredstva međunarodnih fondova zaštite okoliša. Zaključci Okruglog stola bit će putokaz općinskom načelniku i Općinskom vijeću za donošenje odgovarajućih odluka i planiranje narednih aktivnosti na ovom velikom projektu.

**13. 12. 2004**

### **ZAVRŠENO DEMINIRANJE PRILAZA MOSTU PREKO SPREČE KOJI POVEZUJE DONJU ORAHOVICU I PETROVO**

Radi se o teže pristupačnoj površini od 3.6-91,13 kvadratnih metara, na kojoj su u međuvremenu bile deponovane ogromne količine smeća i naplavaka, koje su znatno otežavale posao deminiranja. Posao su izveli demineralne Kantonalne uprave civilne zaštite.

**"LISTAO":  
OMER HAMZIĆ**

16. 12. 2004.

**IZBORNA KOMISIJA BIH PONIŠTILA IZBORE NA BIRAČKOM MJESTU PRIJEKO BRDO I RASPISALA NOVE IZBORE ZA 21. 12. 2004.**

To je epilog pravno-političke rašomonija-de i prepiske na relaciji Općinski odbor SDP – Općinska izborna komisija – Izborna komisija BiH – Apelaciono vijeće Suda Bosne i Hercegovine i konačno – Izborna komisija BiH, koja je u ponovljenom postupku, konačno utvrdila da je, ipak, izvršena krađa izbora na spomenutom biračkom mjestu.

16. 12. 2004.

**IZBOR SPORTISTE GRAČANICE ZA 2004.**

Za najbolje u pionirskoj konkurenciji proglašeni su Selma Kovačević (Karate klub "Dado Alić" Miričina) i Eldar Beganović (Karate klub "Bratstvo" Gračanica); u kadetskoj konkurenciji najbolji su: Alma Zekić (KK "Dado Alić" Miričina); Kenan Karađus (KK "Bratstvo" Gračanica); najbolje ekipe su: Ženski odbojkaški klub "Gračanica" i Rukometni klub "Gračanica"; najbolji sportisti su: Lejla Nurikić (Ženski odbojkaški klub "Gračanica") i Husein Salkić (RK "Gračanica"); za najboljeg sportistu invalida proglašen je Hasib Salkanović; najbolji trener je Jasmin Mrkonja (RK "Gračanica"), najbolji rekreativac je Edin Helić, iz gračaničke pošte, a najbolji sportski radnici su: Nesib Okić (Malonogometni klub "Kaskada"), Nesib Mehanović (RK "Gračanica"), Mugdin Mujačić ("Košarkaški klub "Gračanica"), Hamdija Jukan (FK "Pribava"), Mirsad Selimović (FK "Orahovica 074"), Fikret Serhatlić (FK "Bratstvo"); jednogodišnju stipendiju i posebno priznanje općinskog načelnika dobila je Alisa Sarajlić (Karate klub "Bratstvo")

20. 12. 2004.

**NADINE SUMAN: IZLOŽBA SLIKA U BKC GRAČANICA, PRVO PREDSTAVLJANJE LIKOVNOJ PUBLICI U BOSNI I HERCEGOVINI**

Bilo je to prijatno iznenađenje za ljubitelje likovne umjetnosti u Gračanici, od kojih mnogi nisu ni znali da se Nadin uopće bavi slikar-



BOSANSKI  
KULTURNI  
CENTAR  
GRAČANICA



## Nadine Suman

**6. samostalna izložba slika  
Prva u Bosni i Hercegovini**

---

**20. - 22. decembar 2004. godine  
u 17 sati**

stvom. Rođena je Orleans-u 1971. u Francuskoj, kćerka Lilian i Dine Čolić, udata za Gračanliju Senada Sumana. Osim mnoštva kolektivnih izložbi na likovnim manifestacijama mladih umjetnika Francuske, do sada je imala i pet samostalnih izložbi: dvije u galerijama Honfleur, dvije u Deauville i jednu u Orleans-u. Posjeduje stvaralačku osebnost, oslobodenu jednoznačnosti. Cvijeće je dominantan motiv na njenim slikama "pomaknut u sferu tajnovitog govora stvarnosti". Na njenim slikama preovlađuju zlatne i srebrne boje koje se prelivaju u zgusnute sive ili smeđe nijanse i tonove dovedene do pune umjetničke uvjerljivosti i topline.

21. 12. 2004.

**PONOVLJENI IZBORI U PRIJEKOM BRDU**

Pošto je Apelaciono vijeće Suda BiH utvrdilo nepravilnosti u izbornom postupku, 2. 10. 2004., i prihvatilo žalbu Općinskog odbora SDP Gračanica, Odlukom izborne komisije BiH punoljetni građani ovog sela morali su da obave svoju "građansku dužnost" u ponovljenom postupku. Na glasanje je izašlo 327 birača ili 73,3% (na izborima 2. 10. 2004. izašlo 425 ili 95,29%), važećih listića bilo je 317 ili 96,9%, nevažećih 10; rezultati, odnosno broj dobijenih glasova po strankama: LDS – Liberalno demokratska stranka 1, Narodna stranka radom za boljitak 1, SDA 268, Stranka penzionera, umirovljenika BiH 1 SDU – Socijaldemokratska unija BiH 1, Stranka za BiH 3, BOOS – Bosanska stranka 22, SDP 20, Demokratska stranka invalida 0; ukupno 317. Iznenadjenje je rezultat Bosanske stranke koja je na izborima 2. 10. 2004. dobila samo dva glasa, a u ponovljenim, čak 20. Samo za 79 dana aktivisti ove stranke uspjeli su, dakle, svoj rejting u ovom selu povećati za 10 puta, što je ravno političkom podvigu, pod uslovom da je ostvaren na regularan način. U svakom slučaju, to im je bilo dovoljno da "pomrse" račune SDP-a i sa jednim vijećnikom "ulete" u općinski parlament. Tako se 1 vijećnik prednosti SDA nad SDP u ponovljenom izbornom postupku u Prijekom Brdu "pretvorio" u "bosovca", pa je, nakon svega SDP ostao "kratkih rukava", a SDA praktično "na istom"...

21. 12. 2004.

**UMRO SEJDO ŠABIĆ, PRVI PREDSEDNIK OPĆINE GRAČANICA NAKON PRVIH VIŠESTRANAČKIH PARLAMENTARNIH IZBORA POSLIJE DRUGOG SVJETSKOG RATA**


Rođen je 1919. godine u uglednoj trgovačkoj porodici Šabića. Do 1963. godine bio je direktor Trgovačkog preduzeća "Bosna", potom je počeo razvijati vlastiti privatni biznis. Jedan je od najuglednijih biznismena Gračanice. Više od pola radnog vijeka proveo je u ta-

kozvanoj privatnoj inicijativi – i to u vremenima koja joj nisu bila nimalo naklonjena. Na prvim višestranačkim izborima, 1990. godine, kao kandidat SDA, izabran je za predsjednika općine Gračanica. Tu je funkciju obavljao do kraja septembra 1991. godine, kada se povukao iz zdravstvenih razloga.

22. 12. 2004.

**PROMOCIJA "GRAČANIČKOG GLASNIKA" BR. 18**

Gosti promocije bili su Nihad Halilbegović, Gračanlija iz Sarajeva, publicista i saradnik "Glasnika...", koji je govorio o Časopisu kao projektu od velikog kulturno-historijskog značaja za Gračanicu i Amor Mašović, predsjednik Državne komisije za nestale osobe, iz Sarajeva. Pošto je dao podršku i pohvalio Program prikupljanja podataka o stradanju Bo-



šnjaka općine Gračanica u Drugom svjetskom ratu, koji je objavljen u Časopisu, Amor Mašović je održao nadahnuo predavanje, popraćeno dokumentarnim snimcima na temu "Masovne grobnice u Bosni i Hercegovini – pouke i poruke naše bliže prošlosti". Potresne slike zločina nad Bošnjacima u ratu za Bosnu i Her-

cegovinu 1992. – 1995. ostavile su snažan utisak na mnogobrojne učesnike promocije “Glasnika”.

**28.12.2004.**

### **FARUK ŠIRBEGOVIĆ: PRIZNANJE “HUMANISTA GODINE”**

Predsjedništvo Internacionalne lige humanista proglasilo je Faruka Širbegovića, predsjednika Kompanije “Širbegović”, humanistom godine za 2004. godinu u oblasti promocije Bosne i Hercegovine kao atraktivne lokacije za strane investicije i za ostvarivanje misije Internacionalne lige humanista. Priznanje je to za višegodišnji rad, menadžerske sposobnosti i visoke ljudske kvalitete ovog gračaničkog privrednika.

**28. 12. 2004.**

### **MILIONITI PAR OBUĆE “FORTUNA”**

Ova fabrika je za godinu dana proizvela milion pari obuće, što je apsolutni godišnji rekord u njenoj proizvodnji. Ostvarila je izvoz od 7 miliona KM.

**30. 12. 2004.**

### **NAPOKON, KONSTITUIRAJUĆA SJEDNICA NOVOG OPĆINSKOG VIJEĆA, ZA PREDSEDAVAJUĆEG IZABRAN HASAN FEHRATOVIĆ, VIJEĆNIK SDA**

Zbog izborne krađe koja je dokazana na Apelacionom vijeću Suda BiH i ponovljenih izbora na biračkom mjestu Prijeko Brdo, građani Gračanice morali su nešto duže od ostalih čekati konstituisanje svog lokalnog parlamenta. Budući da su dvije najjače političke grupacije, nakon ponovljenih izbora, u vijeću potpuno izjednačene (po 13 mandata), grčevita je borba vođena za “većinski paket”, do kojeg se moglo doći samo pridobivanjem četvo-

rice vijećnika takozvanog centra (LDS i BOSS po jedan vijećnik i S BiH dva). Nakon dugotrajnog pogađanja (“trgovanja”) i zakulisnog “očijukanja”, famozna “četvorka” priklonila se SDA i omogućila joj da na funkciju predsjedavajućeg vijeća “dovede” svog vijećnika. Za uzvrat dobila je funkciju zamjenika predsjedavajućeg vijeća (volonter). Tako je sa 17 glasova “Za” (13 SDA + četvorka) i 13 “protiv” (SDP), na funkciju predsjedavajućeg Općinskog vijeća (profesionalna funkcija) izabran Hasan Fehratović (1968.), inženjer elektrotehnike iz Gornje Orahovice, do izbora zaposlen u Mješovitoj srednjoj školi u Gračanici, a za zamjenika predsjedavajućeg Musić Muharem, profesor iz Džakula.

Nakon izbora predsjedavajućeg i njegovog zamjenika, održana je i prva radna sjednica Općinskog vijeća, koje je, između ostalog, prihvatilo i u javnu raspravu uputilo Prijedlog općinskog budžeta za 2005. godinu.

**7. 1. 2004.**

### **OTVOREN POSLOVNO-TRGOVAČKI CENTAR GRAČANIČKE FIRME “DŽAMBO”**

Na mjestu nekadašnje uprave zgrade preduzeća “Zanati”, u kojoj je nekada bilo preduzeće “Graplast”, a prije toga sjedište milicije, ponekada i lokalni zatvor, preduzeće “Džam-



bo” izgradilo je moderno uređen prodajno-poslovni prostor na pet etaža, sa ukupno 1.750 kvadratnih metara korisnog prostora. U tom prostoru nalazi se sjedište firme i veliki prodajni salon sa bogatim izborom vodovodnog, elektro i materijala za centralno grijanje. Vrijednost investicije je oko milion KM.

Preduzeće “Džambo” izraslo je iz zanatske radionice sa dva radnika u moderno uređenu i savremenu firmu sa 70 zaposlenih. U procesu male privatizacije, preuzelo je preostalu imovinu, ali i obaveze i radnike nekadašnjeg gračaničkog preduzeća “na izdisaju” “Zanati”. Osim trgovine bavi se preradom drveta i međunarodnim transportom, svoje prodajne objekte, osim Gračanice ima u Tuzli i još nekim mjestima. Preduzeće uspješno vodi direktor i vlasnik Hamdija Džambo.

**15. 1. 2005.**

**ROTARY CLUB GRAČANICA: DONACIJA ŠKOLSKOG NAMJEŠTAJA OSNOVNOJ ŠKOLI “HASAN KIKIĆ” PRVA USPJEŠNA AKCIJA**

Klub djeluje od septembra 2004. godine, okuplja dvadesetak članova, uglednih građana Gračanice - privrednike, intelektualce i uopšte entuzijaste. Aktivnosti Kluba usmjerene su na poboljšanje života zajednice. Uz sedmična

druženja članovi Rotari kluba, nastoje inicirati rješavanje važnih društvenih problema, te u skladu s mogućnostima provoditi određene humanitarne akcije. Na čelu Kluba je gospođa Amira Bravić.

**16. 1. 2005**

**“VEGAFRUIT” NA TRŽIŠTU LIBIJE**

Sa libijskim partnerom potpisan je ugovor o osnivanju fabrike za proizvodnju hrane i sokova iz programa ove ugledne firme “koja je kvalitetom i dosljednošću u prikupljanju i unapređenju vlastite recepture, tragom tradicionalne kuhinje sa ovih prostora, osvojila i tržišta izvan naše države”. Kako piše Komorski informator (Tuzla, br. 2 i 3, 2005.) u ovaj projekta “Vegafruit će uložiti 65% potrebnog kapitala, dok će 35% obezbijediti libijski partner.

**1. 2. 2005.**

**DRUGA SJEDNICA OPĆINSKOG VIJEĆA GRAČANICA: U ZNAKU BURNIH RASPRAVA I VIJEĆNIČKIH NESLAGANJA**

Sa izvjesnim izmjenama, nakon dugotrajnog i zamornog natezanja prihvaćena je Odluka o osnivanju službi za upravu, po kojoj se uspostavljaju četiri službe: za *poduzetništvo, lokalni razvoj i finansije, za prostor-*



no uređenje, geodetske i imovinsko-pravne poslove, za upravu i društvene djelatnosti, stručne i zajedničke poslove i Služba za civilnu zaštitu. Po ovoj odluci funkcionisat će i Kabinet općinskog načelnika i Stručna služba Općinskog vijeća, koju su predložili vijećnici. Odlukom se predviđa dalja racionalizacija i smanjenje administracije između 20 i 30%. Prihvaćena je studija "Mogućnosti snabdijevanja grada Gračanice toplotnom energijom", čime su stvorene formalno-pravne pretpostavke za dalju realizaciju tog velikog projekta. Usvojeno je i rješenje o imenovanju predsjednika i članova radnih tijela Općinskog vijeća.

**11. 2. 2005.**

### **OTVOREN TRŽNI CENTAR "BINGO-FIS" U GRAČANICI**

Na mjestu nekadašnjeg Distributivnog centra u Gračanici, tuzlanska trgovačka firma "Bingo" (osnovana 1993.) otvorila je moderno uređeni prodajni centar, koji se prostire na preko 6.000 kvadratnih metara i kupcima nudi preko 30.000 različitih artikala, dječji prostor za igru, te savremeni ugostiteljski objekat. U sastavu ovog velikog poslovnog centra, koji će znatno obogatiti trgovačku ponudu u Gračanici, ali i šire, nalaze se: hipermarket "Bingo-FIS", "Zi komerc", kožna galanterija, "Anturium", cvjećara i trgovina kućnim ljubimcima, "Peko", prodavnica obuće, "CM" kozmetika, "Beneton", "Plava ruža 2", butik, "Iskra as", bijela tehnika, "Solar & gardinia" i apoteka. U tim prodajnim prostorima zaposlenje je došlo oko 80 radnika.

**11. 2. 2005.**

### **DRUGA SAMOSTALNA IZLOŽBA SLIKA REFIKA MUSTAJBAŠIĆA**

Riječ je o gračaničkom slikaru mlađe generacije, koji je do sada imao nekoliko zajedničkih i jednu samostalnu izložbu. Raznovrsnost detalja i motiva karakteriše stvaralački opus ovog slikara. Na njegovim slikama, ipak, dominiraju pejzaži rodni mu Drafnića iz kojih izbija toplina zavičaja. Izložba je izazvala zapažen interes gračaničke publike, što je prijatno

iznenadilo mladog autora.

**15. 2. 2005.**

### **IMENOVANI NOVI ŠEFOVI SLUŽBI U OPĆINSKOJ "ŠARENOJ KUĆI" I PRED OPĆINSKIM NAČELNIKOM "POLOŽILI ZAKLETU VJERNOSTI"**

Tako je "uvedena u posao" nova rukovodna postava općinske administracije, koja će "obnašati lokalnu izvršnu vlast" u sljedećem sastavu: Zijad Dedić, dipl. ecc., šef Službe za poduzetništvo, lokalni razvoj i finansije (bio na dužnosti općinskog tržnog inspektora), Aida Hodžić, građevinski inženjer, šef Službe za prostorno uređenje, geodetske i imovinsko-pravne poslove (bila na dužnosti općinskog građevinskog inspektora), Senaida Šaković, dipl. pravnik, šef Službe za upravu, društvene djelatnosti, boračko-invalidsku zaštitu i zajedničke poslove (bila na dužnosti šefa Zajedničke službe), Mustafa Bajić, ing. zaštite na radu, šef Službe za civilnu zaštitu (bio na istoj dužnosti) i Omer Hamzić, prof., šef Kabineta općinskog načelnika (bio na dužnosti koordinatora za informisanje i odnose sa javnošću).

**4. 3. 2005.**

### **TREĆA SJEDNICA OPĆINSKOG VIJEĆA: NIJE USVOJEN PREDLOŽENI BUDŽET OPĆINE ZA 2005. GODINU**

...iako je o njemu prethodnih nekoliko mjeseci vođena široka javna rasprava po mjesnim zajednicama, nadležnim institucijama, društvenim organizacijama i udruženjima i napokon, u vijećničkim klubovima. Do početka sjednice pristiglo je dosta amandmana (između ostalih, za povećanje iznosa sredstava političkim strankama, povećanje paušala općinskim vijećnicima, uz istovremeno smanjenje plaća općinskim službenicima, povećanje sredstava za izgradnju pojedinih lokalnih puteva itd.), koje Općinski načelnik kao predlagач nije mogao prihvatiti. Podršku predloženom budžetu uskratili su vijećnici SDA, S BiH, i BOSSA, što je bilo dovoljno da bude vraćen na doradu.

Neslaganja između vijećnika SDP i SDA+S

BiH+BOSS došla su do punog izražaja i oko Odluke o imenovanju komisije za izbor upravnih odbora JU Doma zdravlja i Gradske apoteke, dok su programi rada Općinskog vijeća i općinskog načelnika za 2005. godinu prošli bez veće rasprave. Slično su prošle i informacije o provedenim općinskim izborima, 2. oktobra 2004. i sigurnosnoj situaciji na području općine Gračanica u 2004., kao i izvještaj o radu Službe civilne zaštite općine Gračanica za 2004.

Izvještaj o radu Bosanskog kulturnog centra Gračanica za 2004. godinu takođe nije dobio podršku vijećnika SDA i S BiH.

**14. 3. 2005.**

### **OTAPANJE SNIJEGA PROUZROKOVALO POPLAVE U SPREČKOM POLJU I KLIZIŠTA U BRDSKOM PODRUČJU OPĆINE**

Rijeka Spreča izlila se iz korita skoro cijelom svojom dužinom i poplavila oko 200 hektara obradivog zemljišta na području općine Gračanica. Klizišta su se pojavila u selima: Soko, Doborovci, Miričina, Lukavica, Džakule, Buk, Gornja Orahovica i Malešići...

**21. 3. 2005.**

### **OTVOREN SUPERMARKET "ZEKA-KOMERC" U GRAČANICI**

Ovaj prodajni objekat otvoren je u zgradi trgovačko-polovnog centra "Saš komerc", na ulazu u glavnu gradsku pijacu u Gračanici, koji se tako jednim svojim dijelom stavlja u funkciju. Riječ je super-moderno uređenom prodajnom prostoru u kojem se kupcima nudi roba široke potrošnje, namještaj i bijela tehnika. Otvaranjem ovog supermarketa znatno se obogaćuje trgovačka ponuda u Gračanici.

**29. 3. 2005.**

### **4. SJEDNICA OPĆINSKOG VIJEĆA GRAČANICA: USVOJEN BUDŽET OPĆINE ZA 2005. GODINU, NAKON TOGA SJEDNICA PREKINUTA**

Obim budžeta planiran je u iznosu od 6.938.000 KM, a čine ga: porezni prihodi 3.640.000 KM; neporezni prihodi 2.163.000

KM; tekuće potpore - grantovi 1.025.000 KM i dio kredita Svjetske banke 110.000 KM.

Obrazlažući predloženi Budžet, općinski načelnik Nusret Helić je, između ostalog, rekao: "Iako smo nastojali iznaći optimalno rješenje, kada su u pitanju prihodi, nisam siguran jesmo li uspjeli, jer ne znamo šta će se dešavati sa poreznim prihodima na čije ostvarenje, nažalost, ne možemo uticati.

Pokazatelji o prihodima za dva i po mjeseca ove godine nisu ni malo ohrabrujući i ne daju nam nadu za optimizam, ali nas obavezuju na maksimalnu mobilizaciju i angažovanost kod ubiranja neporeznih prihoda.

Mi smo zaključno sa 18. 3. 2005.godine ostvarili ukupno 966.118 KM ili manje za 29 % u odnosu na isti period prošle godine, odnosno na predviđene izdatke Odlukom o privremenom finansiranju."

U toku razmatranja treće tačke dnevnog reda "Odluka o utvrđivanju kriterija za izbor vijećnika u vijeća mjesnih zajednica", sjednicu su napustili vijećnici S BiH i BOSA, nakon čega je predsjednik Kluba vijećnika SDA zatražio pauzu. Potom su i vijećnici SDA odlučili da napuste sjednicu.

Pošto su konstatovali da nema kvoruma za dalji nastavak sjednice, predsjedavajući i zamjenik predsjedavajućeg su prekinuli rad vijeća. Preostalih 15 tačaka dnevnog reda, među kojima i nešto izmijenjena "Odluka o utvrđivanju kriterija za izbor vijećnika u vijeća mjesnih zajednica", razmatrano je i usvojeno u nastavku sjednice koje je održano 31. 3. 2005.

**2. 4. 2005.**

### **MUHAMED IBRAHIMOVIĆ, AKTUELNI PREDSJEDNIK FEDERALNOG PARLAMENTA, NOVI PREDSJEDNIK SDA GRAČANICA**

Usvajajući ambiciozan politički program i dovodeći ovog iskusnog i visokopozicioniranog funkcionera na čelo svog lokalnog ogranka u Gračanici, SDA je pokazala da s krajnjom ozbiljnošću ulazi u pripreme za parlamentarne izbore koji će se održati sljedeće godine.

**6. 4. 2005.**  
**IBRAHIM ŠERBEČIĆ, NA ČELU GRAČANIČKOG**  
**"MERHAMTETA"**

To je odluka skupštine ovog dobrotvornog društva, koja je izabrala novo rukovodstvo, usvojila izvještaj o radu Društva u 2004. godini kao i dosta ambiciozan program za naredni period.

**6. 4. 2005.**  
**NAČELNIK OPĆINE GRAČANICA NUSRET HELIĆ,**  
**SENATOR BOŠNJAČKOG INSTITUTA**

Među stotinu uglednih imena članova senata Bošnjačkog instituta, koje je imenovao vlasnik te Fondacije Adil-beg Zulfikarpašić, našlo se i ime gračaničkog načelnika. Na svečanoj inauguraciji senatora, uz reprezentativnu izložbu izuzetno vrijedne donacije od 70 ulja, grafika i skulptura našeg poznatog umjetnika Merseda Berbera, Zulfikarpašić je, prema pisanju "Oslobođenja" (16. 4. 2004, str. 26), između ostalog izjavio: "Činjenica je da je ideja Bošnjačkog instituta meni donijela više radosti nego što sam očekivao, a mojoj zemlji i mojim prijateljima više koristi nego što su mislili." Činjenica je da je imenovanje Helića u to prestižno tijelo, ne samo priznanje njemu lično, već i Gračanici kao čaršiji, koja se ponosi svojom kulturno-historijskom baštinom i nacionalnom bošnjačkom tradicijom.

**7. 4. 2005.**  
**IZLOŽBA HASANA FAZLIĆA U BKC**  
**GRAČANICA**

Povodom 7. aprila Dana oslobođenja Gračanice u Drugom svjetskom ratu, gračanički "Preporod" i BKC organizovali su reprezentativnu izložbu ovog velikog bosanskohercegovačkog umjetnika, nosioca prestižnih domaćih i svjetskih priznanja za karikaturu. Izloženo je

37 odabranih karikatura i predstavljena umjetnička monografija Hasana Fazlića. Izložbu je otvorio član Predsjedništva Općinske organizacije SUBNOAR-a Ibrahim Nurkić.

Na kraju svog opširnog eseja u uvodnom dijelu likovne Monografije ovog velikog umjetnika, Sulejman Bosto je ispisao sljedeće rečenice: "U ovom pogledu Fazlić i u svojoj ljudskoj i umjetničkoj ulozi ostaje svjedokom vremena, krećući se rubnim zonama svjetlosti i tame, između životne vedrine i životne gorčine. U svom svijetu karikature on istovremeno igra i poigrava sa slikom čovjeka, kazujući višeznačnu istinu o njemu i skidajući lažnu pozlatu sa (danas kompromitiranog) humanističkog ideala čovjeka, skidajući lažnu pozlatu sa njegove uglačane slike, - pri tom ipak čuvajući fragilnu ljepotu životne radosti i vedrine."



Hasan Fazlić, Miroslav Krleža, bez datuma, pero, tuš. Hasan Fazlić, Caricatures, Sarajevo, 2004., str. 192



**23. 4. 2005.**

### **DRAŽA MIHAJLOVIĆ PONOVO MEĐU OZRENSKIM SRBIMA**

Pošto su prije nekoliko godina svojoj glavnoj ulici dali ime vrhovnog četničkog komandanta iz Drugog svjetskog rata Draže Mihajlovića, mještani Petrova su ime "svog voljenog Čiče" ubilježili i na spomen ploču, koju je na uzvišenju Lužanjak, u prisustvu pedesetak osoba, otkrio Miroslav Spasić, predsjednik Četničkog ravnogorskog pokreta za područje Ozrena. Spomen-ploča je otkrivena u znak sjećanja na prolazak Draže Mihajlovića sa ostatkom svojih razbijenih jedinica kroz Ozren i Trebavu, početkom 1945. godine.

Tako su Ozrenici, uz prisjećanje na glavnog junaka iz svoje četničke tradicije, "na prigodan način obilježili 60. godišnjicu pobjede nad fašizmom". Svako, dakle, obilježava i ubilježava svoje historijske likove na svoj način i po svojoj mjeri. Napomena: aktuelne lokalne vlasti nisu podržale ovu akciju Ravnogorskog četničkog pokreta.

**23. 4. 2005.**

### **ŠMJENA NA ČELU SDP-A GRAČANICA: SEAD ČAUŠEVIĆ, NOVI PREDSJEDNIK**

To je odluka Izvještajno-izborne konferencije Općinske organizacije SDP koja je izabrala novo rukovodstvo SDP, usvojila izvještaj o

radu za period 2003. – 2005. i Program rada do 2009. godine.

**29. 4. 2005.**

### **PETA SJEDNICA OPĆINSKOG VIJEĆA GRAČANICA: U ZNAKU IZVJEŠTAJA IZ OBLASTI ZDRAVSTVA**

Vijećnici su bez velike rasprave usvojili Izvještaj o izvršenju općinskog budžeta za prošlu godinu (ukupan prihod 5.973.044 KM) i odluku o komunalnim taksama, koje su nešto veće u odnosu na prethodni period.

Usvojena je i odluka o anketi kao sredstvu za utvrđivanje prioriteta u mjesnim zajednicama i kriterijima za određivanje prioriteta. Što se tiče zdravstva, vijećnici su pohvalili rad Doma zdravlja u prethodnoj godini i istovremeno odbili izvještaj o radu i finansijskom poslovanju opće bolnice "Dr. Mustafa Beganović". Usvojen je i izvještaj o radu Apoteke u Gračanici, te izvještaj o radu i finansijskom poslovanju "Sportske sale" Gračanica.

Nakon mučnog natezanja "otkočena" je dalja procedura izbora i imenovanja upravnih odbora u javnim ustanovama zdravstva na općini.

Usvojen je i program obavljanja komunalnih usluga i zajedničke komunalne potrošnje u 2005. godini, informacija o efektima privatizacije preduzeća na općini u 2004. i izvještaj o procjeni šteta od elementarnih nepogoda.